

Estrat dal Verbâl de Assemblee Gjenerâl Ordenarie dai 27 di Març dal 2022

Clamade adun cun letare dai 26 di Zenâr dal 2022, prot. nr. 26/22, daûr dal art. 10 dal Statût,

- in prime convocazion, sabide ai 26 di Març dal 2022, a 11 sot sere;
- in seconde convocazion, domenie ai 27 di Març dal 2022, a 9.30 di buinore;

si è tignude a Udin, tal Centri Culturâl des Graciis in borc di Praclûs 21 e in modalitât telematiche, la Assemblee Gjenerâl Ordenarie de Societât Filologjiche Furlane, par discuti di chest ordin dal dì:

1. Esam, discussion e aprovazion dai documents di Belanç 2021;
2. Esam, discussion e aprovazion dai documents di Belanç di prevision 2022;
3. Elezion dal Consei Gjenerâl, elezion dal Uffici di Presidence, elezion dal Coleç dai Revisôrs dai conts, elezion dai Probivîrs;
4. Autorizacion a la stipule di une polize di assicurazion pe responsabilitât civîl pai aministradôrs, diretôrs e funzionaris;
5. Variis.

Al è a cjâf de assemblee il President de Societât Filologjiche Furlane, Federico Vicario.

Daûr dal art. 10 come 3 dal Statût, stant che a la prime convocazion no si è presentât nissun, il President al declare costituide cun regolaritât in seconde convocazion la Assemblee Gjenerâl dai socis de Societât Filologjiche Furlane "Graziadio Isaia Ascoli".

Il President al propon Feliciano Medeot, Diretôr de Societât, tant che segretari verbalizant de Assemblee; la Assemblee e fâs buine la propueste a la unanimitât.

Il President al domande a ducj i presints di rispietâ un moment di corot par ducj i socis che a son mancjâts vie pal 2021 e tai prins mêis dal 2022.

Pont n. 3 dal ordin dal dì:

Elezion dal Consei Gjenerâl, elezion dal Uffici di Presidence, elezion dal Coleç dai Revisôrs dai conts, elezion dai Probivîrs.

Daûr dal art. 11 dal Regolament pai lavôrs de Assemblee, il President al propon l'aprovazion dal numar dai components dal Consei Gjenerâl in 70 e dal Uffici di Presidence in 11. L'Assemblee e fâs buine la propueste a la unanimitât.

Il President al propon:

- di scomençâ daurman lis votazions pes elezions dal Consei Gjenerâl, dal Uffici di Presidence, dal Coleç dai Revisôrs dai conts, dai Probivîrs. L'Assemblee e fâs buine la propueste a la unanimitât;
- di nomenâ i components de Comission Verifiche Podês, che pe assemblee di chest an e à ancje la funzion di comission eletorâl, tes personis di Elio Varutti, Gianmarco Pfeiffer e Luca Rossi. L'Assemblee e fâs buine la propueste a la unanimitât.

Il President al informe che lis operations di scrutini e la proclamazion dai candidâts elets a scomençaran a la fin de Assemblee Ordenarie dai Socis e al vignarà scrit il verbâl di dutis lis operations di vôt e di scrutini.

Pont n. 1 dal ordin dal dì:

Esam, discussion e aprovazion dai documents di Belanç 2021.

Il President al presente la Relazion morâl e, daspò, la relazion su lis ativitâts dal 2021. A conclusion, il President al passe la peraule al Tesorîr de Societât, Carlo del Torre, che al presente il rindicont di gjestion 2021 e il Stât patrimoniâl al 31.12.2021 de Societât, che al evidenzie un risultât economic de gjestion dal esercizi negatîf par un impuart di 1.553,77 euro e al propon di cuvierzi la pierdite doprant lis risiervis.

Al interven il President dai Revisôrs dai Conts, Carlo Plet, che al lei la relazion dant parê positîf su l'aprovazion dal Belanç 2021 di bande de Assemblee dai socis e su la propueste fate dai aministradôrs di doprâ lis risiervis par cuvierzi il risultât negatîf di esercizi.

A la fin de relazion e dai intervents, si passe a la votazion dal Belanç 2021 e de propueste fate dai aministradôrs di doprâ lis risiervis di patrimoni par cuvierzi il risultât negatîf di esercizi, che a vegnin fats bogns a la unanimitât.

Pont n. 2 dal ordin dal dì:

Esam, discussion e aprovazion dai documents di Belanç di prevision 2022.

Il President al presente a la Assemblee lis liniis di ativitât de Societât pal 2022 e il prospet dal Belanç di prevision pal 2022.

Il Diretôr al precise che, in considerazion de riforme dal Codiç dal Tierç Setôr (CTS) e de emanazion dai principis di control dai Ents dal Tierç setôr e de cjame di voris, impen e responsabilitâts pretendûts dai revisôrs, tant che orghin di control, si propon ae assemblee di ricognossi pal trieni 2022-2024 un compens anuâl di 3.000,00 euro complessîfs plui lis spesis di leç par ducj i components dal Coleç.

Si passe duncje a la votazion dal Belanç di prevision 2022 e dal Belanç dal trieni 2022-2024, che a vegnin fats bogns a la unanimitât.

Pont n. 4 dal ordin dal dì:

Autorizacion a la stipule di une polize di assicurazion pe responsabilitât civîl pai aministradôrs, diretôrs e funzionaris.

Il President al passe la peraule al tesorîr Carlo del Torre che al ilustre la propueste di autorizacion a la stipule di une polize di assicurazion pe responsabilitât civîl pai aministradôrs, diretôrs e funzionaris. A la fin de ilustrazion il President al domande se a son intervents.

No jessint intervents si passe duncje ae votazion de stipule de polize di assicurazion che e ven fate buine ae unanimitât.

Pont n. 5 dal ordin dal dì:

Variis.

Il President al passe la peraule ai socis.

E interven Novella Del Fabbro che e informe l'assemblee su lis iniziativis di promozion de lenghe furlane in Cjargne e su la situazion de emitent VideoTeleCarnia.

Il President al comuniche che lis votacions pe elezion dai orghins sociâi si sierin a misdî.

Stant che nol è altri ce discuti, la Assemblee si siere a 11.30.

Udin, ai 27 di Març dal 2022

Il segretari verbalizant
Feliciano Medeot